

Namminersorlutik Oqartussat sulisoqarnermut allaffeqarfiani akisussaaffiit piginnaasallu pillugit kaajallaasitaq

Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersumi § 23, imm. 1 naapertorlugu, makkua aalajangersarneqarput:

Ataatsimoortunik isumaqatigiissuteqartarnerit tamakkuninngalu nassuiaanerit

§ 1. Aningaasaqarnermut Sulisoqarnermullu Aqutsisoqarfik sulisartut kattuffii isumaqatigiinninniarsinnaatitaasut peqatigalugit ataatsimoorussamik isumaqatigiissutinik isumaqatigiissuteqassapput aammalu akissarsiassatigut isumaqatigiissutit, isumaqatigiissutit, malittarisassat, kaajallaasitat il.il. sulisoqarnermut tunngatillugu immikkoortortaqaqfimmi atulersinneqarsimasut pillugit nassuiaassapput.

Aningaasaqarnermut Sulisoqarnermullu Aqutsisoqarfimmi piginnaasat

§ 2. Aningaasaqarnermut Sulisoqarnermullu Aqutsisoqarfimmi, inassuteqareerneratigut aamma immikkoortortaqaqfinni pineqartuni aqutsisut siunnersiorlugit, tullinnguuttut makku pillugit imatut aalajangiisoqarpoq:

- 1) akissarsianik aalajangersaanerit, tassunga ilanngullugit akissarsiassat assigiinngissutaat tapillu,
- 2) akissarsiat inissisimanerat,
- 3) inunnik ataasiakkaanik atorfinitsitsinissamik isumaqatigiissusiernerit aamma
- 4) tjenestemandit soraarnerussutisiaat

Imm. 2. Aningaasaqarnermut Sulisoqarnermullu Aqutsisoqarfimmi atorfinitsitsinernut isumaqatigiissutit suliarineqartarput.

Aqutsisut piginnaasaat

§ 3. Immikkoortortaqaqfinni ataasiakkaani aqutsisut § 4 naapertorlugu aalajangiisoqareersimatillugu aamma Aningaasaqarnermut Sulisoqarnermullu Aqutsisoqarfimmit siunnersuisoqareerneratigut imatut aalajangiisarput:

- 1) atorfinitsitsinerit
- 2) soraarsitsinerit,
- 3) naalanngisaanerit pillugit pineqaatissiinerit aamma
- 4) nussuinerit.

Pinngitsaaliisummik siunnersuisarnerit

§ 4. Aqutsisut § 3, imm. 2-4-t naapertorlugit aalajangiinnginneranni immikkoortortaqaqfinni ataasiakkaani aqutsisut Aningaasaqarnermut Sulisoqarnermullu Aqutsisoqarfimmi siunnersueqqaartassapput.

Imm. 2. Aningaasaqarnermut Sulisoqarnermullu Aqutsisoqarfimmi siunnersuisoqartarpoq aamma suliassani § 3-mut ilaatinneqartunut allakkiassatut, illua tungerisanik tusarniaassutissatut il.il. missingiutinik suliaqartoqartarpoq.

Imm. 3. Immikkoortortaqaqfimmi aqutsisut § 3 naapertorlugu aalajangeereeraangatta aalajangerup assileneqarnera aalajangernermiit kingusinnerpaamik ullut marluk qaangiuppata Aningaasaqarnermut

Sulisoqarnermullu Aqutsisoqarfimmut nassiunneqartassaaq.

Imm. 4. Suliassani ataasiakkaani ilaanneeriarluni § 2 aamma 3 naapertorlugit suliakkiisarnerit pisinnaatitaanerillu pillugit Aningaasaqarnermut Sulisoqarnermullu Aqutsisoqarfimmiut immikkoortortaqaqfinnik ataasiakkaanik isumaqatigiissuteqartarsinnaapput.

Naalakkersuisoqarfimmi pisortamut nalunaarutit

§ 5. Immikkoortortaqaqfimmi aqutsisoq imatut iliorpat Aningaasaqarnermut Sulisoqarnermullu Aqutsisoqarfimmit Naalakkersuisoqarfimmi pineqartumi pisortamut nalunaaruteqartoqartassaaq:

- 1) Aningaasaqarnermut Sulisoqarnermullu Aqutsisoqarfik peqataatinnagu § 2, imm. 1, nr. 1-3-t malillugit aalajangiisoqarpat,
- 2) Aningaasaqarnermut Sulisoqarnermullu Aqutsisoqarfimmiut siunersioqqaarnagit § 3, nr. 2-4-nut ilaatinneqartut pillugit aalajangiisoqarpat imaluunniit
- 3) Aningaasaqarnermut Sulisoqarnermullu Aqutsisoqarfimmit siunnersuinerit sumiginnarneqarsimappata aamma immikkoortortaqaqfinni ataasiakkaani sulisut oqaloqatigereerlugit aalajangerneq kukkuneqarujussuarsimasoq amigaateqartorluunniit Aningaasaqarnermut Sulisoqarnermullu Aqutsisoqarfimmit nalilernerqarpat.

Imm. 2. Aalajangiineq pineqartoq Naalakkersuisoqarfimmi pisortamit aalajangiineruppat Aningaasaqarnermut Sulisoqarnermullu Aqutsisoqarfimmit Naalakkersuisut Siulittaasuata Naalakkersuisoqarfiani aamma Aningaasaqarnermut Naalakkersuisoqarfimmi pisortanut nalunaaruteqartoqartoqassaaq.

Isumaqatigiissutinik aaqqiiniarnerit

§ 6. Aningaasaqarnermut Sulisoqarnermullu Aqutsisoqarfup immikkoortortallu pineqartup akornanni § 2, imm. 1-3 naapertorlugit aalajangiiniarnermi isumaqatigiinngitsoqartillugu suliaq Aningaasaqarnermut Sulisoqarnermullu Aqutsisoqarfimmit imaluunniit immikkoortortaqaqfimmit Naalakkersuisut Siulittaasuata Naalakkersuisoqarfiani aamma Aningaasaqarnermut Naalakkersuisoqarfimmi pisortanut saqqummiunneqarsinnaavoq.

Immikkoortortaqaqfinnut ilisimatitsissutit

§ 7. Naalakkersuisoqarfii kaajallaasitaq manna pillugu aamma Kalaallit Nunaanni Namminersorlutik Oqartussanut tamanut atuunna pillugu aqutsisoqarfinnut immikkoortortaqaqfinnullu allanut ilisimatitsinissamik akisussaaffeqarput.

Atuutilerfia atorunnaarsitsinerlu

§ 8. Kaajallaasitaq manna 8. april 2020-mi atuutilissaaq.

Imm. 2. Tamanna ilutigalugu Namminersorlutik Oqartussat sulisoqarnermut allaffeqarfiani akisussaaffiit piginnaasallu pillugit kaajallaasitaq aamma Aningaasaqarnermut Sulisoqarnermullu Aqutsisoqarfimmi sulisut pillugit siunnersuisartuutitat atorunnaarsinneqarput.

Naalakkersuisut Siulittaasuata Naalakkersuisoqarfia, ulloq 7. april 2020

Kim Kielsen (atsior.)

/

Hans-Peder Barlach Christensen (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut